

ЖИЗЗАХ ТУМАЛАРАРО ИҚТИСОДИЙ СУДИНИНГ

(Даъво аризани кўрмасдан қолдириш
тўғрисида)

АЖРИМИ

Жиззах

шаҳри

2023 йил 20 апрел

Жиззах туманлараро иқтисодий суди судьяси О.С.Асатовнинг раислигида, судья ёрдамчиси Ж.Маматовнинг котиблигида, Ўзбекистон Фермер, деҳқон хўжаликлари ва томорқа ер эгалари Ш.Рашидов туман Кенгашининг даъвогар «Бўз сув жилоси» фермер хўжалиги манфаатида жавобгар «Жиззах индустриал тўқима» МЧЖга нисбатан берган даъво аризаси бўйича қўзғатилган ишни тарафлар иштирокисиз Жиззах туманлараро иқтисодий суди биносида, очиқ суд мажлисида кўриб чиқиб, қуйидагиларни –

А Н И Қ Л А Д И :

Ўзбекистон Фермер, деҳқон хўжаликлари ва томорқа ер эгалари Ш.Рашидов туман Кенгаши (бундан буён матнда Кенгаш деб юритилади) даъвогар «Бўз сув жилоси» фермер хўжалиги (бундан буён матнда даъвогар деб юритилади)нинг манфаатида Жиззах туманлараро иқтисодий судига даъво ариза билан мурожаат қилиб, «Жиззах индустриал тўқима» МЧЖ(кейинги ўринларда жавобгар деб юритилади)дан 438 834 159 сўм қарз ва 131 650 247 сўм пеня ундиришни сўраган.

Судга жавобгар медиатив келишувни тақдим этиб, тарафлар низони ўзаро медиатив келишув орқали ҳал этганликларини баён этиб, ушбу медиатив келишув тузилганлиги боис, даъвони кўрмасдан қолдиришни сўраган.

Суд мажлисининг вақти ва жойи тўғрисида тегишли тартибда хабардор қилинган даъвогар ва жавобгар суд мажлисига келмади.

Суд, иш ҳужжатларини ўрганиб чиқиб, қуйидаги асосларга кўра, даъво аризасини кўрмасдан қолдиришни лозим деб топди.

Тарафлар ўртасида 2023 йил 7 апрелда тузилган медиатив келишувда мазкур иқтисодий иш медиация тартибида ҳал этилганлиги тасдиқланган.

“Медиация тўғрисида” ги Ўзбекистон Республикаси Қонунининг 15-моддасига кўра медиация тарафларнинг хоҳиш-истаги асосида қўлланилади.

Медиация суддан ташқари тартибда, низони суд тартибида кўриш жараёнида, суд ҳужжатини қабул қилиш учун суд алоҳида хонага (маслаҳатхонага) киргунига қадар, шунингдек суд



ҳужжатлари ва бошқа органлар ҳужжатларини ижро этиш жараёнида қўлланилиши мумкин.

Медиация низони ҳакамлик судида кўриш жараёнида ҳам ҳакамлик судининг қарори қабул қилингунига қадар қўлланилиши мумкин.

Медиация суд ҳужжатлари ва бошқа органлар ҳужжатларини ижро этиш жараёнида қўлланилган тақдирда фаолиятини профессионал асосда амалга оширувчи медиаторнинг албатта иштирок этиши талаб этилади.

Медиацияда иштирок этганлик факти айбни тан олиш далили бўлиб хизмат қилиши мумкин эмас.

Мазкур Қонуннинг 29-моддасида медиация тартиб-таомилини амалга ошириш натижалари бўйича тарафлар келиб чиққан низо ёхуд мажбуриятларни бажариш шартлари ва муддатлари хусусида ўзаро мақбул қарорга эришган тақдирда, тарафлар ўртасида ёзма шаклда медиатив келишув тузилади.

Давлат органи ёки бошқа орган томонидан қайси шахснинг манфаатларини кўзлаб даъво тақдим этилган бўлса, ўша шахс мазкур давлат органининг ёки бошқа органнинг иштирокисиз медиатив келишув тузишга ҳақли.

Медиатив келишув уни тузган тарафлар учун мажбурий кучга эга бўлиб, ушбу келишув унда назарда тутилган тартибда ҳамда муддатларда тарафлар томонидан ихтиёрий равишда бажарилади.

Медиатив келишув бажарилмаган тақдирда тарафлар ўз ҳуқуқлари ҳимоя қилинишини сўраб судга мурожаат этишга ҳақли.

Медиатив келишув бажарилмаслигининг оқибатлари тарафлар томонидан ушбу келишувнинг ўзида белгилаб қўйилиши мумкин.

Ўзбекистон Республикаси Иқтисодий процессуал кодексининг 107-моддаси 5³-бандида, тарафлар ўртасида медиатив келишув тузилган бўлса, суд даъво аризасини кўрмасдан қолдириши белгиланган.

Ўзбекистон Республикаси “Давлат божи тўғрисида”ги Қонунининг 18-моддаси, биринчи қисми 9-бандида, агар тарафлар ўртасида медиатив келишув тузилган бўлса, даъво ариза кўрмасдан қолдирилганда давлат божи қайтарилиши белгиланган.

Бундай ҳолатда, суд тарафлар ўртасида медиатив келишув тузилганлиги сабабли, даъво аризасини кўрмасдан қолдиришни, суд харажатлари масаласини муҳокама қилиб, иш медиатив келишув тузилиш йўли билан яқунланганлиги сабабли давлат божи ундирмасликни, ихтиёрий тўлаб чиқилган 30 000 сўм почта харажати даъвогар зимасида қолдиришни лозим топди.

Юқоридагиларга асосан, Ўзбекистон Республикаси Иқтисодий процессуал кодексининг 107-моддаси 5³-банди, 108 ва 195-моддаларини қўллаб, суд-,

А Ж Р И М Қ И Л Д И:



Ўзбекистон Фермер, деҳқон хўжаликлари ва томорқа ер эгалари Ш.Рашидов туман Кенгаши Жиззах вилоят ҳудудий бошқармасининг даъвогар «Бўз сув жилоси» фермер хўжалиги манфаатида жавобгар «Жиззах индустриал тўқима» МЧЖга нисбатан берган 438 834 159 сўм қарз ва 131 650 247 сўм пеня ундириш тўғрисидаги даъво аризаси тарафлар ўртасида медиатив келишув тузилганлиги муносабати билан кўрмасдан қолдирилсин.

Ажримдан норози бўлган тарафлар бир ой муддат ичида шу суд орқали Жиззах вилоят судининг иқтисодий ишлар бўйича судлов ҳайъатига апелляция шикояти (протести) бериши мумкин.

Судья

О.С.Асатов

